

REGLUGERÐ

um réttaraðstoðarváttryggingar.

1. gr.

Með réttaraðstoðarváttryggingu tekur váttryggingafélag að sér gegn greiðslu iðgjalds að bera kostnað við málarekstur og að veita aðra þjónustu sem fellur innan gildissviðs váttryggingarinnar. Í því felst einkum að stuðla að því að váttryggður fái bætur fyrir bótaskyld tjón með uppgjöri utan dómstóla, í einkamáli eða sakamáli, eða verja hinn váttryggða og koma fram fyrir hans hönd í málarekstri í einkamáli, sakamáli eða öðrum málarekstri eða vegna kröfu sem sett er fram gagnvart honum og fellur innan gildissviðs váttryggingarinnar.

2. gr.

Reglugerð þessi hefur að markmiði að koma í veg fyrir hagsmunaárekstur váttryggðs og váttryggingafélags vegna réttaraðstoðarváttryggingar, einkum þegar váttryggingafélag váttryggir aðila deilumáls sem jafnframt eru váttryggðir hjá sama váttryggingafélagi.

Reglugerðin á ekki við um eftirfarandi:

- 1) Réttaraðstoðarváttryggingu, sem varðar ágreining eða áhættu vegna notkunar fars sem ætlað er til siglinga á sjó.
- 2) Starfsemi váttryggingafélags sem felst í því að veitt er ábyrgðartrygging í því skyni að verja hinn váttryggða eða koma fram fyrir hans hönd við hvers konar málsrannsókn eða málarekstur þegar váttryggjandinn hefði jafnframt eigin hagsmuna að gæta samkvæmt slíkri váttryggingu.
- 3) Í því tilviki að réttaraðstoðin sé veitt í öðru aðildarríki Evrópska efnahagssvæðisins en því sem hinn váttryggði hefur fast aðsetur og réttaraðstoðin er hluti af samningi er aðeins tekur til aðstoðar sem veitt er fólki er lendir í erfiðleikum á ferðalagi, fjarri heimili eða föstu aðsetri. Í slíkum tilvikum skal koma skýrt fram í váttryggingasamningnum að váttryggingin sé takmörkuð við þessar aðstæður.

3. gr.

Sérstakir váttryggingaskilmálar skulu gilda um réttaraðstoðarváttryggingu. Þeir skulu aðgreindir frá váttryggingaskilmálum annarra váttryggingagreina eða hafðir í sérstökum kafla þegar um samsetta váttryggingu er að ræða.

4. gr.

Váttryggingafélag skal taka upp að minnsta kosti einn af eftirfarandi möguleikum sem valkost:

- 1) Váttryggingafélag skal sjá til þess að starfsmenn þess sem hafa með höndum uppgjör krafna vegna réttaraðstoðar eða lögfræðilega ráðgjöf sem því tengist hafi ekki samtímis með höndum hliðstæða starfsemi á vegum þess vegna annars greinaflokks váttrygginga sem það hefur með höndum. Hið sama á við ef viðkomandi er starfsmaður annars félags sem er í fjármálagum, viðskiptalegum eða rekstrarlegum tengslum við fyrrnefnda váttryggingafélagið.
- 2) Váttryggingafélag skal fela sjálfstæðum aðila í hendur uppgjör tjónakrafna vegna réttaraðstoðarváttrygginga. Heiti þess aðila skal koma fram í váttryggingasamningi. Hlutleysis skal gætt við val á aðila í þessu efni til samræmis við markmið þessarar reglugerðar.
- 3) Í váttryggingasamningi skal váttryggingafélag áskilja váttryggðum þann rétt að fela lögmanni að hans eigin vali að gæta hagsmuna hans gagnvart því eða, að því marki sem lög heimila, annan til þess hæfan einstakling.

Litið er svo á að hagsmunir þeirra sem njóta eiga verndar samkvæmt réttaraðstoðarváttryggingu séu jafnvel tryggðir hvaða leið sem valin er samkvæmt 1. - 3. tl. 1. mgr.

5. gr.

Í váttryggingasamningi um réttaraðstoð skal skýrt kveðið á um eftirfarandi:

- a) Að þegar leitað er aðstoðar lögmanns eða annars sem hæfur telst samkvæmt lögum að verja váttryggðan, koma fram fyrir hans hönd eða að gæta hagsmuna við málsrannsókn eða málarekstur, skuli váttryggðum frjálst að velja sér lögmann eða þann mann annan sem telst hæfur.
- b) Hafi váttryggjandi valið úrræði skv. valkostum 1 eða 2 í 1. mgr. 4. gr. er váttryggðum frjálst að velja sér lögmann eða ef hann óskar annan hæfan mann til þess að gæta hagsmuna sinna hvenær sem hagsmunaárekstrar koma upp.

6. gr.

Váttryggingafélag skal sjá til þess að váttryggður samkvæmt réttaraðstoðarváttryggingu fái fullnægjandi upplýsingar um réttarstöðu sína vegna ágreinings sem upp hefur komið og rekja má til váttryggingasamnings hjá félaginu. Hinn váttryggði skal upplýstur um hvaða aðilar hafi með höndum þjónustu vegna kvörtunar- eða ágreiningsmála vegna váttryggingasamninga við váttryggingafélög án þess að skerða rétt hlutaðeigandi til þess að skjóta málum til dómstóla.

Ef upp kemur hagsmunaárekstur eða ágreiningur um lausn deilumáls skal váttryggingafélag eða þegar við á sá aðili sem sér um tjónsuppgjör skýra váttryggðum frá því sem kveðið er á um í 4. - 5. gr.

7. gr.

Reglugerð þessi er sett samkvæmt heimild í 6. mgr. 22. gr. og 98. gr. laga um váttryggingastarfsemi nr. 60/1994, með síðari breytingum. Reglugerðin byggir á ákvæðum tilskipunar um skaðatryggingar nr. 73/239/ESB með síðari breytingum, þ. á m. tilskipun um réttaraðstoðarváttryggingar nr. 87/344/ESB. Reglugerðin öðlast þegar gildi.

Viðskiptaráðuneytinu, 9. febrúar 1998.

Finnur Ingólfsson.

Halldór J. Kristjánsson.

SAMÞYKKT

**um breytingu á samþykkt um stjórn Kópavogsbæjar og fundarsköp
bæjarstjórnar nr. 262/1990, með síðari breytingum.**

1. gr.

1. másl. 50. gr. samþykktarinnar orðast svo: Bæjarráð skal að jafnaði halda fund einu sinni í viku á hverjum fimmtudegi kl. 12.15.

Samþykkt þessi sem gerð er af bæjarstjórn Kópavogsbæjar samkvæmt ákvæðum 3. mgr. 7. gr. og 49. gr. sveitarstjórnarlaga nr. 8/1986 staðfestist hér með til að öðlast þegar gildi.

Félagsmálaráðuneytinu, 9. febrúar 1998.

F. h. r.

Húnbogi Þorsteinsson.

Sesselja Árnadóttir.